

書書類

法法羅

雅粹菴

言言論

書書



書法雅言

明 項

穆篋

穆字德純號貞元亦號無稱子秀水人

書統

河馬負圖洛龜呈書此天地開文字也義畫八卦文列六爻此聖王啓文字也若乃龍鳳龜麟之名穗雲科斗之號篆籀嗣作古隸爰興時易代新不可殫述信後傳今篆隸焉爾歷周及秦自漢逮晉眞行迭起章草浸華文字菁華敷宣盡矣然書之作也帝王之經綸聖賢之學術至于玄文內典百氏九流詩歌之勸懲碑銘之訓戒不由斯字何以紀辭故書之爲功同流天地翼衛教經者也夫投壺射矢猶標觀德之名作聖述明本列入仙之品宰我稱仲尼賢于堯舜余則謂逸少兼乎鍾張大統斯垂萬世不易第唐賢求之筋力軌度其過也嚴而謹矣宋賢求之意氣精神其過也縱而肆矣元賢求之性情體態其過也溫而柔矣其間豪傑奮起不無超越尋常槩觀習俗風聲大都互有優劣我明肇運尙襲元規豐祝文姚竊追唐陽上宗逸少大都畏難夫堯舜人皆可爲翰墨何畏于彼逸少我師也所願學是焉奈自祝文絕世以後南北王馬亂眞邇年以來競做蘇米王馬疎淺俗怪易知其非蘇米激厲矜誇罕悟其失斯風一倡靡不可追攻乎異端害則滋甚況學術經綸皆由心起其心不正所動悉邪宜聖作春秋子輿距楊墨懼道將日衰也其言豈得已哉柳公權曰心正則筆正余則曰人正則書正取舍諸篇不無商韓之刻心相等論實同孔孟之思六經非心學乎傳經非六書乎正書法所以正人心也正人心所以閑聖道也子輿

距楊墨于昔。子則放蘇米于今。垂之千秋。識者復起。必有知正書之功。不愧爲聖人之徒矣。

古今

書契之作。肇自顓皇。佐隸之簡。興于嬴正。他若鳥宿芝英之類。魚蟲薤葉之流。紀夢瑞于當年。圖形象于一日。未見真蹟。徒著虛名。風格既湮。考索何據。信今傳後。貴在同文。探賸搜奇。要非適用。故書法之目。止以篆隸古文。兼乎真行草體。書法之宗。獨以羲獻蕭永。佐之虞褚陸顏。他若急就飛白。亦當游心。歐張李柳。或可涉目。所謂取法乎上。僅得乎中。切規後賢。翼追前哲。匪曰生今之世。不能及古之人。學成一家。不必廣師羣妙者也。米元章云。時代壓之。不能高古。自畫固甚。又云。真者在前。氣焰逼人。畏彼益深。至謂書不入晉。徒成下品。若見真蹟。惶恐殺人。既推二王。獨擅書宗。又阻後人。不敢學古。元章功罪。足相衡矣。噫。世之不學者。固無論矣。自稱能書者。有二病焉。嚴搜海釣之夫。每索隱于秦漢。非坐管窺之輩。恆取式于宋元。太過不及。厥失維均。蓋謂今不及古者。每云。今妍古質。以奴書爲誚者。自稱獨擅成家。不學古法者。無稽之徒也。專泥上古者。豈從周之士哉。夫夏彝商鼎。已非汗尊。坏飲之風。上棟下宇。亦異巢居穴處之俗。生乎三代之世。不爲三皇之民。矧夫生今之時。奚必反古之道。是以堯舜禹周。皆聖人也。獨孔子爲聖之大成。史李蔡杜。皆書祖也。惟右軍爲書之正鵠。柰何泥古之徒。不悟時中之妙。專以一畫偏長。一波故壯。妄誇崇質之風。豈知三代後賢。兩晉前哲。尙多太朴之意。宣聖曰。文質彬彬。然後君子。孫過庭云。古不乘時。今不同弊。審斯二語。與世推移。規矩從心。中和爲的。謂之曰。天之未喪斯文。逸少于今。復起。苟微若

人吾誰與歸

辯體

夫人靈于萬物。心主于百骸。故心之所發。蘊之爲道德。顯之爲經綸。樹之爲勛猷。立之爲節操。宣之爲文章。運之爲字蹟。爰作書契。政代結繩。刪述侔功。神仙等妙。苟非達人上智。孰能玄鑒入神。但人心不同。誠如其面。由中發外。書亦云然。所以染翰之士。雖同法家。揮毫之際。各成體質。考之先進。固有說焉。孫過庭曰。矜斂者弊于拘束。脫易者失于規矩。躁勇者過于剽迫。狐疑者溺于滯澁。此乃舍其所長而指其所短也。夫悟其所短。恆止于苦難。恃其所長。多畫于自滿。孫子因短而攻短。予也就長而刺長。使藝成獨擅。不安于一得之能。學出專門。益進于通方之妙。理工辭拙。知罪甘焉。夫人之性情。剛柔殊稟。手之運用。乖合互形。謹守者拘斂襟懷。縱逸者度越典則。速勁者驚急無蘊。遲重者怯鬱不飛。簡峻者挺掘鮮遁。嚴密者緊實寡逸。溫潤者妍媚少節。標險者彫繪太苛。雄偉者固愧容夷。婉暢者又慚端厚。莊質者蓋嫌魯朴。流麗者復過浮華。駛動者似欠精深。纖茂者尙多散緩。爽健者涉茲剽勇。穩孰者缺彼新奇。此皆因夫性之所偏。而成其資之所近也。他若偏泥古體者。蹇鈍之迂儒。自用爲家者。庸僻之俗吏。任筆驟馳者。輕率而踰律。臨池猶豫者。矜持而傷神。專尙清勁者。枯峭而罕姿。獨工豐豔者。濃鮮而乏骨。此又偏好任情。甘于暴棄者也。第施教者貴因材。自學者先克己。審斯二語。厭倦兩忘。與世推移。量人進退。何慮書體之不中和哉。

形質

穹壤之間。齒角爪翼。物不俱全。氣稟使然也。書之體狀多端。人之造詣各異。必欲衆妙兼備。古今恐無全書矣。然天地之氣。雨暘燠寒。風雷霜雪。來備時敍。萬物榮滋。極少過多。化工皆覆。故至聖有參贊之功。君相有變理之任。皆所以節宣陰陽而調和元氣也。是以人之所稟。上下不齊。性賦相同。氣習多異。不過曰中行。曰狂。曰狷而已。所以人之于書。得心應手。千形萬狀。不過曰中和。曰肥。曰瘦而已。若而書也。脩短合度。輕重協衡。陰陽得宜。剛柔互濟。猶世之論相者。不肥不瘦。不長不短。爲端美也。此中行之書也。若專尙清勁。偏乎瘦矣。瘦則骨氣易勁。而體態多瘠。獨工豐豔。偏乎肥矣。肥則體態常妍。而骨氣每弱。猶人之論相者。瘦而露骨。肥而露肉。不以爲佳。瘦不露骨。肥不露肉。乃爲尙也。使骨氣瘦峭。加之以沈密雅潤。端莊婉暢。雖瘦而實腴也。體態肥纖。加之以便捷遒勁。流麗峻潔。雖肥而實秀也。瘦而腴者。謂之清妙。不清則不妙也。肥而秀者。謂之豐艷。不豐則不艷也。所以飛燕與王嬙齊美。太真與采蘋均麗。譬夫桂之四分。梅之五瓣。蘭之孕馥。菊之含叢。芍藥之富艷。芙渠之燦灼。異形同翠。珠質共芳也。臨池之士。進退于肥瘦之間。深造于中和之妙。是猶自狂狷而進中行也。慎毋自暴且棄哉。

品格

夫質分高下。未必羣妙攸歸。功有淺深。詎能美善咸盡。因人而各造其成。就書而分論其等。擅長殊技。略有五焉。一曰正宗。二曰大家。三曰名家。四曰正源。五曰傍流。並列精鑒。優劣定矣。會古通今。不激不厲。規

矩諳練。骨態清和。衆體兼能。天然逸出。巍然端雅。奕矣奇鮮。此謂大成已集。妙入時中。繼往開來。永垂模軌。一之正宗也。篆隸章草。種種皆知。執使轉用。優優合度。數點衆畫。形質等殊。各字終篇。勢態迴別。脫胎易骨。變相改觀。猶之世祿巨室。方寶盈藏。時出具陳。煥驚神目。二之大家也。真行諸體。彼劣此優。速勁遲工。清秀豐麗。或鼓骨格。或炫標姿。意氣不同。性真悉露。譬之醫卜相術。聲譽廣馳。本色偏工。藝成獨步。三之名家也。溫而未厲。恭而少安。威而寡夷。清而歎潤。屈仰背向。儼具儀刑。揮灑弛張。恪遵典則。猶之清白舊家。循良子弟。未弘新業。不墜先聲。四之正源也。縱放悍怒。賈巧露鋒。標置狂巔。恣來肆往。引倫蛇挂。頓擬臺蹲。或枯瘦而巉巖。或穠肥而泛濫。譬之異卉奇珍。驚時駭俗。山雉片翰。如鳳海鯨一鬣。似龍也。斯謂傍流。其居五焉。夫正宗尙矣。大家其博。名家其專乎。正源其謹。傍流其肆乎。欲其博也。先專與。其肆也。寧謹。由謹而專。自專而博。規矩通審。志氣和平。寢食不忘。心手無厭。雖未必妙入正宗。端越乎名家之列矣。

資學

書之法則。點畫攸同。形之楮墨。性情各異。猶同源分派。共樹殊枝者。何哉。資分高下。學別淺深。資學兼長。神融筆暢。苟非交善。詎得從心。書有體格。非學弗知。若學優而資劣。作字雖工。盈虛舒慘。迴互飛騰之妙。用弗得也。書有神氣。非資弗明。若資邁而學疎。筆勢雖雄。鈎揭導送。提搶截拽之權度。弗熟也。所以資貴聰穎。學尙浩淵。資過乎學。每失顛狂。學過乎資。猶存規矩。資不可少。學乃居先。古人云。蓋有學而不能。未有不學而能者也。然而學可勉也。資不可強也。天資縱哲。標奇炫巧。色飛魂絕于一時。學識諳練。入矩應

規作範垂模于萬載。孔門一貫之學。竟以參魯得之。甚哉。學之不可不確也。然人之資稟有溫弱者。有剽勇者。有遲重者。有疾速者。知克己之私。加日新之學。勉之不已。漸入于安。萬川會海。成功則一。若下筆之際。枯澁拘攣。苦迫蹇鈍。是猶朽木之不可雕。頑石之難乎琢也。已。譬夫學謳之徒。字音板調。愈唱愈熟。若唇齒漏風。喉舌砂短。沒齒學之。終奚益哉。

附評

夫自周以後。由漢以前。篆隸居多。楷式猶罕。真章行草。趨吏適時。姑略上古。且詳今焉。夫道之統緒。始自三代。而定于東周。書之源流。肇自六爻。而盛于兩晉。宣尼稱聖時中。逸少永寶爲訓。蓋謂通今會古。集彼大成。萬億斯年。不可改易者也。第自晉以來。染翰諸家。史牒彰名。縹緗著姓。代不乏人。論之難殫。若品格居下。真蹟無傳。予之所列。無復議焉。蓋聞張鍾義獻。書家四絕。良可據爲軌矚。爰作指南。彼之四賢。資學兼至者也。然細詳其品。亦有互差。張之學。鍾之資。不可尙已。逸少資敏乎張。而學則稍謙。學篤乎鍾。而資則微遜。伯英學進十矣。資居七焉。元常則反乎張。逸少皆得其九。子敬資稟英藻。齊轍元常。學力未深。步塵章草。惜其蘭折不永。躡彼駿馳。玉琢復磨。疇追驥驟。自云勝父。有所恃也。加以數年。豈萍語哉。六朝名家。智永精熟。學號深矣。子雲飄舉。資稱茂焉。至于唐賢之資。褚李標幟。論乎學力。陸顏蜚聲。若虞若歐。若孫若柳。藏真張旭。互有短長。或學六七而資四五。或資四五而學六七。觀其筆勢。生熟。姿態。端妍。槩可辯矣。宋之名家。君謨爲首。齊範唐賢。天水之朝。書流底柱。李蘇黃米。邪正相半。總

而言之。傍流品也。後之書法。子昂正源。鄧俞伯機。亦可接武。妍媚多優。骨氣皆劣。君謨學六而資七。子昂學八而資四。休哉蔡趙兩朝之脫穎也。元章之資。不減褚李。學力未到。任用天資。觀其纖濃詭厲之態。猶夫排沙見金耳。子昂之學。上擬陸顏。骨氣乃弱。酷似其人。大抵宋賢資勝乎學。元手學優乎資。使稟元章之審質。勵子昂之精專。宗君謨之遒勁。師魯直之懸腕。不惟越軌三唐。超踪宋元。端居乎逸少之下。子敬之上矣。明興以來。書蹟難糅。景濂有貞。仲珩。伯虎。僅接元蹤。伯琦。應禎。孟舉。原博。稍知唐宋。希哲存體。資學相等。初範晉唐。晚歸怪俗。競爲惡態。駭諸凡夫。所謂居夏而變夷。棄陳而學許者也。然令後學知宗晉唐。其功豈少補邪。文氏父子。徵仲學比子昂。資甚不逮。筆氣生尖。殊乏蘊綴。小楷一長。秀整而已。壽承休承。資皆勝父。入門既正。克紹箕裘。要而論之。得處不逮豐祝之能。邪氣不染二公之陋。仲溫章草。古雅微存。公綬行真。朴勁猶在。高陽道復。僅有米芾之遺風。民則立剛。盡是趨時之吏手。若能以豐祝之資。兼徵仲之學。壽承之風逸。休承之峭健。不幾乎歐孫之再見耶。若下筆之際。苦澁寒酸。如倪瓚之手。縱加以老彭之年。終無佳境也。

規矩

天圓地方。羣類象形。聖人作則。制爲規矩。故曰。規矩方圓之至。範圍不過。曲成不遺者也。大學之旨。先務修齊正平。皇極之嚆。首戒偏側反陂。且帝王之典謨訓誥。聖賢之性道文章。皆託書傳。垂教萬載。所以明彝倫而淑人心也。豈有放僻邪侈。而可以昭蕩平正直之道者乎。古今論書。獨推兩晉。然晉人風氣。疎宕

不羈右軍多僣體裁獨妙。書不入晉固非上流法。不宗王詎稱逸品。六代之歷初唐蕭羊以逮智永。尙知趨向一體成家。奈自懷素降及大年。變亂古雅之度。競爲詭厲之形。暨夫元章以豪逞卓犖之才。好作鼓努驚奔之筆。且曰大年之書。愛其偏側之勢。出于二王之外。是謂子貢賢于仲尼。邱陵高于日月也。豈有舍仲尼而可以言正道。異逸少而可以爲法書者哉。奈何今之學書者。每薄智永子昂似僧手。誚眞卿公權如將容。夫顏柳過于嚴厚。永趙少夫奇勁。雖非書學之大成。固自書宗之正脈也。且穹壤之間。莫不有規矩。人心之良。皆好乎中和。宮室材木之相稱也。烹炙滋味之相調也。笙簫音律之相協也。人皆悅之。使其大小之不稱。酸辛之不調。宮商之不協。誰復取之哉。試以人之形體論之。美丈夫貴有端厚之威儀。高逸之亂氣。美女子尙有貞靜之德性。秀麗之容顏。豈有頭目手足粗邪癩瘡。而可以稱美好者乎。形象器用。無庸言矣。至于鳥之窠。蜂之窩。蛛之網。莫不圓整而精密也。可以書法之大道而禽蟲之不若乎。此乃物情猶有知識也。若夫花卉之清艷。葉瓣之疎聚。莫不圓整而脩對焉。使其半而舒。半而欒也。皆瘠瘞之病。豈其本來之質哉。獨怪偏側出王之語。肇自元章。一時之論。致使淺近之輩。爭賞豪末之奇。不探中和之源。徒規誕怒之病。殆哉書脈危幾一縷矣。況元章之筆。妙在轉折結構之間。略不思齊鑒倣。徒擬放縱剽勇之失。妄誇具得神奇。所謂舍其長而攻其短。無其善而有其病也。與東施之效顰。復奚間哉。

圓爲規以象天。方爲矩以象地。方圓互用。猶陰陽互藏。所以用筆貴圓。字形貴方。旣曰規矩。又曰之至。是圓乃圓神。不可滯也。方乃通方。不可執也。此由自悟。豈能使知哉。晉魏以前篆書稍長。隸則少匾鍾。

王真行會合中和迨及信本以方增長降及旭素既方更圓或斜復直有如何本兩字促之若一字腰昇本一字縱之若二字者然旭素飛草用之無害世但見草書若爾予嘗見其郎官等帖則又端莊整飭儼然唐氣也後世庸陋無稽之徒妄作大小不齊之勢或以一字而包絡數字或以一傍而攢簇數形強合鈎連相排相紐點畫混沌突縮突伸如楊祕圖張汝弼馬一龍之流且自美其名曰梅花體正如瞽目丐人爛手折足繩穿老幼惡狀醜態齊唱俚詞游行村市也夫梅花有盛開有半開有未開故爾參差不等若開放已足豈復有大小混雜者乎且花之向上倒下朝東面西猶書有仰妝俯壓左顧右盼也如其一枝過大一枝過小多而六瓣少而四瓣又焉得謂之梅花耶形之相列也不雜不糅瓣之五出也不少不多由梅觀之可以知書矣彼有不察而漫學者甯非海上之逐臭哉

常變

宣尼疾固規矩諸說無乃固乎古人有缺波折刀之形畫沙印泥之勢無乃越于規矩之外哉夫字猶用兵同在制勝兵無常陣字無定形臨陣決機將書審勢權謀廟算務在萬全然陣勢雖變行伍不可亂也字形雖變體格不可踰也譬之青天白雲和風清露朗星皓月寒雪暑雷此造化之生機其常也迅雷激電霖雨颶風夏雹冬雷揚沙霾霧此陰陽之殺機其變也凡此之類勢不終朝四時皆然晦冥無晝矣所以脫口跳足大笑狂歌園林邱壑知己相逢飲酒翫花或可乃爾如君親侍從之前大賓臨祭之日豈容狂放恣肆若此乎是故宮殿廟堂典章紀載真爲首尙表牘亭館移文題勒行乃居先借使奏狀碑署潦

草顛狂褻悖何甚哉。信知真行爲書體之常。草法乃一時之變。趙壹非之。豈無謂哉。所云草體有別法焉。撥鐙提捺。真行相通。留放鈎環。勢態迥異。旋轉圓暢。屈折便險。點綴精彩。挑豎枯勁。波趯耿決。飛度飄颻。流注盤紆。駐引竊繞。頓之以沈鬱。奮之以奔馳。奕之以翩颺。激之以峭拔。或如篆籀。或如古隸。或如急就。或如飛白。又若衆獸駭首而還跼。羣鳥舉翅而欲翔。猿猴騰挂乎叢林。蛟龍蟠蜿于山澤。隨情而綽其態。審勢而揚其威。每筆皆成其形。兩字各異其體。草書之妙。畢于斯矣。至于行草。則復兼之。矧挫行藏。緩急措置。損益于真草之間。會通于意態之際。奚慮不臻其妙哉。

正奇

書法要旨。有正與奇。所謂正者。偃仰頓挫。揭按照應。筋骨威儀。確有節制是也。所謂奇者。參差起復。騰凌射空。風情姿態。巧妙多端是也。奇卽運于正之內。正卽列于奇之中。正而無奇。雖莊嚴沈實。恆朴厚而少文。奇而弗正。雖雄爽飛妍。多譎厲而乏雅。奈夫賞鑑之家。每指豪端努奮之巧。不悟規矩法度之踰。臨池之士。每炫技于形勢猛誕之微。不求工于性情骨氣之妙。是猶輕道德而重功利。退忠直而進奸雄也。好奇之說。伊誰始哉。伯英急就。元常楷跡。去古未遠。猶有分隸餘風。逸少一出。揖讓體樂。森嚴有法。神彩攸煥。正奇混成也。子敬始和父韻。後宗伯英。風神散逸。爽朗多姿。梁武稱其絕妙超羣。舉之浮實。唐文目以拘攣餓隸。貶之太深。孫過庭曰。子敬以下。鼓努爲力。標置成體。工用不侔。神情懸隔。斯論得之。書至子敬。尙奇之開矣。嗣後智永專範右軍。精熟無奇。此學其正而不變者也。羊欣思齊大令。舉止依樣。此學其奇

而不變者也。迨夫世南傳之智永，內含剛柔，立意沈粹，及其行草，逾媚不凡，然其筋力稍覺寬馘矣。李邕初師逸少，擺脫舊習，筆力更新，下手挺聳，終失窘迫，律以大成，殊越轂率。此行真之初變也。歐陽信本亦擬右軍，易方爲長，險勁瘦硬，崛起削成，若觀行草，復太猛峭矣。褚氏登善，始依世南，晚追逸少，逾勁溫婉，豐美富艷，第乏天然，過于雕刻，此真行之再變也。考諸永淳以前，規模大都清雅，暨夫開元以後，氣習漸務威嚴，顏清臣蠶頭燕尾，閔偉雄深，然沈重不清暢矣。柳誠懸骨鯁氣剛，耿介特立，然嚴厲不溫和矣。此真書之三變也。張氏從申，源出于敬，筆氣絕似北海，抑揚低昂，則甚雕琢矣。釋氏懷素，流從伯英，援豪大似驚蛇，圓轉牽掣，則甚詭禿矣。此草行之三變也。書變若爾，豈徒文兵云哉。大抵不變者，情拘于手正，好變者，意刻于探奇。正奇既分爲二，書法自醇入漓矣。然質朴端重以爲正，剽急駭動以爲奇，非正奇之妙用也。世之厭常以喜新者，每舍正而慕奇，豈知奇不必求，久之自至者哉。假使雅好之士，留神翰墨，窮搜博究，月習歲勤，分布條理，諳練于胸襟，運用抑揚，精熟于心手，自然意先筆後，妙逸忘情，墨灑神凝，從容中道，此乃天然之功，自得之能，猶夫西子毛嬙，天姿國色，不施粉黛，輝光動人矣。何事求奇于意外之筆，後垂超世之聲哉。

中和

書有性情，卽筋力之屬也。言乎形質，卽標格之類也。真以方正爲體，圓奇爲用，草以圓奇爲體，方正爲用，真則端楷爲本，作者不易，速工草則簡縱居多，見者亦難便曉。不真不草，行書出焉，似真而兼乎草者，行

真也。似草而兼乎真者，行草也。圓而且方，方而復圓，正能含奇，奇不失正，會于中和，斯爲美善。中也者，無過不及是也。和也者，無乖無戾是也。然中固不可廢，和亦不可離。中如禮節，樂和本然之體也。禮過于節，則嚴矣。樂純乎和，則淫矣。所以禮尙從容而不迫，樂戒奪倫而噉如。中和一致，位育可期。況夫翰墨者哉。方圓互成，正奇相濟，偏有所着，卽非中和。使楷與行，真而偏，不拘鈍卽稜峭矣。行草與草而偏，不寒俗卽放誕矣。不知正奇參用，斯可與權。權之謂者，稱物平施，卽中和也。唐之諸賢，雖各成家，然有一手而獨擅一二長者，有多能而反拙一二體者。臨學之士，貴擇善而從焉。陸東之得法于世南，晚擅出藍之譽。予嘗見其所書蘭亭詩，無一筆不出右軍。第少飄逸和暢之妙爾。張伯高世目爲顛，然其見擔夫爭道，聞鼓吹，觀舞劍，而知筆意，固非常人也。其真書絕有繩墨，草字奇幻百出，不踰規矩。乃伯英之亞，懷素豈能及哉。米芾乃謂其變亂古法，驚諸凡夫。何其苛于責人而昏于自反耶。顏清臣雖以真楷知名，實過厚重。若其行真如鹿脯帖，行草如爭坐祭姪帖，又舒和遒勁，豐麗超動，上擬逸少，下追伯施，固出歐李輩也。獨其自敍一帖，麤魯詭異，且過鬱濁，酷非平日意態。米芾乃獨傲之，亦好奇之病爾。唐書雖有三變，虞褚之真與行草，陸李之行真，魯公之行草，率更之真書，長史之飛草，所謂出類拔萃，固非隨波逐流者也。懷素聖母藏真，亦多合作。大字千文，則穠肆矣。小字千文，太平淡矣。世傳自敍帖，殊過枯誕，不足法也。主善以爲師，甯非步玉之階梯哉。

老少

書有老少。區別淺深。勢雖異形。理則同體。所謂老者。結構精密。體裁高古。巖岫聳峯。旌旗列陣。是也。所謂少者。氣體充和。標格雅秀。百般滋味。千種風流。是也。老而不少。雖古拙峻偉。而鮮豐茂秀麗之容。少而不老。雖婉暢纖妍。而乏沈重典實之意。二者混爲一致。相待而成者也。試以人品喻之。謀猷諳練。學識宏深。必稱黃髮之彥。詞氣清亮。舉動利便。恆數俊髦之英。老乃書之筋力。少則書之姿顏。筋力尙強健。姿顏貴美悅。會之則並善。析之則兩乖。融而通焉。書其幾矣。玄鑒之士。求老于典則之間。探少于神情之內。若其規模宏遠。意思窈窕。抑揚旋折。恬曠雍容。無老無少。難乎名狀。如天仙玉女。不能辯其春秋。此乘之上也。初視雖少。細觀實老。丰采秀潤。結束巍峩。引拂輕颺。氣度凜毅。世所謂少年老成。乘之次也。鱗羽參差。峯巒掩映。提撥飛健。縈紆委婉。衆體異勢。各字成形。乃如一堂之中。老少羣聚。則又次焉。筋力雄壯。骨氣峻潔。劍拔弩張。熊蹲虎踞。祇見其老。不見其少。有若師儒壽考。正色難犯。又其次焉。燦爛似錦。豔麗如花。初視彩煥。詳觀散怯。正如平時誇伐。自稱弘濟。一遇艱大。節義遂虧。抑又其次矣。若夫任筆成形。聚墨爲勢。漫作偏欹之相。妄呈險放之姿。疎縱無歸。輕浮鮮着。風斯下矣。復何齒哉。

神化

書之爲言散也。舒也。意也。如也。欲書必舒散懷抱。至于如意所顧。斯可稱神。書不變化。匪足語神也。所謂神化者。豈復有外于規矩哉。規矩入巧。乃名神化。固不滯不執。有圓通之妙焉。況大造之玄功。宣洩于文字神化也者。卽天機自發。氣韻生動之謂也。日月星辰之經緯。寒暑晝夜之代遷。風雲雷雨之聚散。山嶽

河海之流峙。非天地之變化乎。高士之振衣長嘯。揮塵談玄。佳人之臨鏡拂花。舞袖流盼。如豔卉之迎風。泣露。似好鳥之調舌。搜翎。千態萬狀。愈出愈奇。更若煙霏林影。有相難着。潛鱗翔翼。無迹可尋。此萬物之變化也。人之于書。形質法度。端厚和平。參互錯綜。玲瓏飛逸。誠能如是。可以語神矣。世之論神化者。徒指體勢之異常。豪端之奮筆。同聲而贊賞之。所識何淺陋哉。約本其由。深探其旨。不過日相時而動。從心所欲。云爾。宣尼逸少。道統書源。匪由悉邪也。鄉黨之恂恂。在朝之侃侃。執圭之跼跼。私覲之怡怡。于魯而章甫。適宋而逢掖。至夫漢方朔贊。意涉環奇。燕樂毅諡。情多抑鬱。脩禊集敘。興逸神怡。私門誓文。情拘氣塞。此皆相時而動。根乎陰陽舒慘之機。從心所欲。溢然闢雖哀樂之意。非夫心手交暢。焉能美善兼通。若是哉。相時而動。或知其情。從心所欲。鮮悟其理。蓋欲正而不欲邪。欲熟而不欲生。人之恆心也。規矩不能精。諸心手尚在矜疑。將志帥而氣不充。意先而筆不到矣。此皆不能從心之所欲也。至于欲既從心。豈復矩有少踰者耶。宣尼既云從心。復云不踰者。恐越于中道之外爾。譬之投壺引射。豈不欲中哉。手不從心。發而不中矣。然不動則不變。能變卽能化。苟非至誠。焉有能動者乎。澄心定志。博習專研。字之全形。宛爾在目。筆之妙用。悠焉忘思。自然腕能從臂。指能從心。瀟灑神飛。徘徊翰逸。如庖丁之解牛。掌上之弄丸。執筆者自難揣摩。撫卷者豈能測量哉。中庸之爲物。不貳。生物不測。孟子曰。深造自得。左右逢源。生也逢也。皆由不貳。深造得之。是知書之欲變化也。至誠其志。不息其功。將形著明動。一以貫萬。變化而化焉。聖且神矣。噫。此由心悟。不可言傳。字者孳也。書者心也。字雖有象。妙出無爲。心雖無形。用從有主。初學條理。必有所

事因象而求意。終及通會。行所無事。得意而忘象。故曰。由象識心。拘象喪心。象不可着。心不可離。未書之前。定志以師其氣。將書之際。養氣以充其志。勿忘勿助。由勉入安。斯于書也。無間然矣。夫雨粟鬼哭。感格神明。徵往俟來。有爲若是。法書仙手。致中極和。可以發天地之玄微。宣道義之蘊奧。繼往聖之絕學。開後覺之良心。功將禮樂同休。名與日月並曜。豈惟明窗淨几。神怡務閒。筆硯精良。人生清福而已哉。

心相

蓋聞德性根心。眸盞生色。得心應手。書亦云然。人品既殊。性情各異。筆勢所運。邪正自形。書之心。主張布算。想像化裁。意在筆端。未形之相也。書之相。旋折進退。威儀神彩。筆隨意發。既形之心也。試以人品喻之。宰輔則貴有愛君容賢之心。正直忠厚之相。將帥則貴有盡忠立節之心。智勇萬全之相。諫議則貴有正道格君之心。謇諤不阿之相。隱士則貴有樂善無悶之心。遺世仙舉之相。由此例推。儒行也。才子也。佳人也。僧道也。莫不有本來之心。合宜之相者。所謂有諸中必形諸外。觀其相可識其心。柳公權曰。心正則筆正。余今日。人正則書正。心爲人之帥。心正則人正矣。筆爲書之充。筆正則書正矣。人由心正。書由筆正。卽詩云。思無邪。禮云。無不敬。書法大旨。一語括之矣。嘗鑒古蹟。聊指前人。世不俱聞。略焉弗舉。如桓溫之豪悍。王敦之揚厲。安石之躁率。跋扈剛愎之情。自露于豪楮間也。他如李邕之挺竦。蘇軾之肥欬。米芾之努肆。亦非純粹貞良之士。不過嘯傲風騷之流爾。至于褚遂良之遒勁。顏真卿之端厚。柳公權之莊嚴。雖于書法少容夷俊逸之妙。要皆忠義直亮之人也。若夫趙孟頫之書。溫潤閒雅。似接右軍正脈之傳。妍媚纖

柔。殊乏大節不奪之氣。所以天水之裔。甘心仇胡之祿也。故欲正其書者。先正其筆。欲正其筆者。先正其心。若所謂誠意者。卽以此心端已澄神。勿虛勿貳也。致知者。卽以此心審其得失。明乎取舍也。格物者。卽以此心博習精察。不自專用也。正心之外。豈更有說哉。由此篤行。至于深造自然。秉筆思生。臨池志逸。新中更新。妙之益妙。非惟不奇而自奇。抑亦已正而物正矣。夫經卦皆心畫也。書法乃傳心也。如罪斯言爲迂。予固甘焉勿避矣。

取舍

蘇米之蹟。世爭臨摹。予獨哂爲效顰者。豈妄言無謂哉。蘇之點畫雄勁。米之氣勢超動。是其長也。蘇之濃聳稜側。米之猛放驕淫。是其短也。皆緣天資雖勝。學力乃疎。手不從心。藉此掩醜。譬夫優伶在場。歌喉不接。假彼鑼鼓。亂茲音聲耳。夫顰一也。西子以顰而加妍。東施效之而增醜。何哉。西子明眸皓齒。光彩射人。閨情幽怨。痛心攢眉。悽悽楚楚。可憫可憐。是知顰乃其病。非其常也。使其館娃宮中。姑蘇臺上。懨懨悶悶。感鎖蛾眉。夫差豈復見寵耶。東施本無麗質。妄自學其愁眉。反見陋嫗。殊可憎惡。臨擬之士。取長舍短。豈非善學者哉。抑自周秦以後。逸少以前。專尙篆隸。罕見眞行。簡朴端厚。不皆文質兩彬。鞅勒殘碑。無復完神可做。逸少一出。會通古今。書法集成。模楷大定。自是而下。優劣互差。試舉顯名。今世遺蹟僅存者。拔其美善。指其瑕疵。庶取舍旣明。則趨向可定矣。智永世南得其寬和之量。而少俊邁之奇。歐陽詢得其秀勁之骨。而乏溫潤之容。褚遂良得其鬱壯之筋。而鮮安閒之度。李邕得其豪挺之氣。而失之疎窘。顏柳得其